

合肥縣志卷第十二

賜進士出身廬州府合肥縣知縣左輔纂修

祠祀志

社稷壇 在西平門外三里壇制北向東西二丈五尺南北二丈五尺高三尺四寸四出階各三級壇下東西南各五尺北十二丈或九丈五尺繚以周垣石主高二丈五尺方一尺埋於壇內正中止露其頂神牌二以木爲之府書府社之神府稷之神縣書縣社之神縣稷之神祭時社主於東稷主於西歲以春秋仲月上戊日致祭府州縣皆正印官主祭以各學教

官糾儀生員充禮生祭品羊一豕一尊一位各帛一鉶二簠二簋二邊四豆四爵二主祭官行三跪九叩禮餘皆如儀其四月雩祭則統風雲雷雨山川城隍并先農之神合祭於社稷壇禮亦如之凡府有壇廟附郭之縣統於所尊不別設

先農壇 在威武門外五里堡藉田內南向禮制俱與社稷同各省藉田以雍正五年始田皆四畝九分每歲仲春官率所屬耆老農夫行耕藉禮農具赤色牛黑色廂青色耔種從土宜守壇農夫灌漑收入米穀用過粢盛造冊報布政司耕藉日期每歲欽天監

擇日頒行

風雲雷雨山川城隍壇 在南薰門外南向祭以春秋上巳日禮制俱與社稷同

郡厲壇 在拱辰門外歲以清明七月望十月朔日致祭前期守土官詣城隍神以祭厲告至期黎明請城隍神位入壇祭用羊三豕三米飯三石主祭官行一跪三叩禮祭畢城隍神還

鄉厲壇 在各鄉鄉耆各立於其里耆老歲時各於其鄉致祭有勸誡文

里社壇 亦鄉耆各立於其里歲以春秋仲月社日

祭社神穀神祭畢長幼以次就坐盡歡而退有誓文
關帝廟 在和平橋東明弘治七年知府馬金重修
歲以春秋二仲及仲夏中旬三日致祭雍正五年追
封三代公爵同日祭於後殿祭品前殿帛一牛一羊
一豕一登一鉶二簋二簋二遵十豆十尊一爵三後
殿三案各帛一羊一豕一鉶二簋簋各二遵豆各八
尊一爵三主祭官前殿行三跪九叩禮後殿行二跪
六叩禮餘皆如儀有明知府葉逢春碑記載集文
文昌宮 在鎮淮樓北宋建乾隆時重修嘉慶六年
追封三代神用木主歲祭以春秋仲月禮同關廟有

知府和騰額重修碑記載集文

火神廟 在水西門街南嶽廟西歲以六月二十三

日知縣主祭祭以羊豕行二跪六叩禮

劉猛將軍廟 在東門城外白衣庵西明嘉靖時知

府龍誥建今潛山廟內亦有神位歲以正月十三日
及冬至後三戌日知縣主祭祭用羊豕行二跪六叩

禮

按降靈錄神名承忠吳川人元末授指揮弱冠臨
戎兵不血刃羣盜鼠竄遁江淮千里飛蝗蔽天神
揮劍逐之須臾蝗飛境外後因鼎革自沈於河有

司奏請崇祀

八蜡廟 在余公廟橋北明嘉靖間知府龍誥建後徙德勝門外天啓間知縣陳琯仍移建舊址有邑人龔萃肅碑記載集文

以上壇廟皆官民如制建祭餘附後

府城隍廟 在府學東北宋皇祐時建歷代重修有
余忠宣公碑記載集文

縣城隍廟 在南門土街乾隆年知縣陳大中建
龍王廟 在水西門街火神廟西又淵濟龍王廟在
大蜀山今圯廣惠龍王廟在土山感應龍王廟在小

蜀山義濟龍王廟在浮槎山

白龍王廟 在德勝門外二十里蔡家橋南

馬神廟 在縣署西舊金斗驛乾隆三十九年建

金龍四大王廟 在時雍門外里化橋南

都土地廟 在高家坎康熙八年建雍正十二年知

府尤拔世修嘉慶五年重修

旗纛廟 在衛署西北隅今圯

東嶽廟 在東城內七星街南元至元時建明嘉靖

時重修又撮城鎮羅家壩將軍嶺各有廟

南嶽廟 在惠政橋西又城西八十里高廟南又長

城鎮皆有廟

伏羲廟 在伏羲山

女媧廟 在梁鄉

三皇廟 在府治南橫街萬厯時知府潘榛修有郡人蔡悉記載集文乾隆二十八年知府王成重修

巢湖聖妃廟 舊志在姥山晉時敕建又城南新河口亦有廟明黃道日記

徐將軍廟 在南鄉南河口將軍卽巢湖神有明宋濂碑記載集文

名宦 鄉賢 忠義 孝弟 節孝祠俱詳學校志

包孝肅公祠 在香花墩明知府朱鑑建嘉慶六年
知縣左輔修春秋致祭有祠生黃金左輔記載集文
余忠宣公祠 本在東門外明知府馬金建春秋致
祭有祠生今改祠德勝門外有明李東陽記載集文
周府丞祠 在明教臺東春秋致祭有祠生有明知
府葉逢春記載集文
瞿都督祠 在洛水橋西雍正七年都督能裔孫恂
請建春秋致祭有祠生

以上四賢祠皆官民如制建祭餘附後

申將軍廟 在梁鄉舊志云昔楚白公作亂楚王以

申明戍之白公懼執明父諭明退師明以旣受君命
當移孝爲忠追敗之白公怒殺其父楚王欲賞明明
曰我有定國之功而有害父之恥遂自刎人爲立廟
按舊志不知何本類非事實据韓詩外傳楚有士
曰申鳴治園以養父母孝聞於楚王召之申鳴辭
不往其父曰王欲用汝何故辭之申鳴曰何舍爲
子乃爲臣乎其父曰使汝有祿於國有位於朝汝
樂而我不憂矣我欲汝之仕也申鳴曰諾遂之朝
受命楚王以爲左司馬其年遇白公之亂殺令尹
子西司馬子期申鳴因以兵之衛白公謂石乞曰

申鳴天下勇士也今將兵爲之柰何石乞曰吾聞申鳴孝子也劫其父以兵使人謂申鳴曰子與我則與子分楚國不與我則殺乃父申鳴流涕而應之曰始則父之子今則君之臣已不得爲孝子矣安得不爲忠臣乎援桴鼓之遂殺白公其父亦死焉王歸賞之申鳴曰受君之祿避君之難非忠臣也正君之法以殺其父又非孝子也行不兩全名不兩立悲夫若此而生又何以示天下士哉遂自刎而死劉向說苑亦載此而文小異然申鳴皆不言何地人若白公之亂則在楚國都爲今湖北荊

州府治之江陵縣與梁縣無涉豈因亂由白公而
左傳又載有吳人伐慎白公敗之之事遂以梁縣
爲古慎縣又因之輾轉附會耶

張遼廟 在威武門甕城內今廢

楊將軍廟 在西城上祀宋少保楊存忠嘉慶七年
知縣左輔重修有記載集文

喬張二公廟 在府治東祀宋統制喬仲福張璟紹
興間瓊鄺叛二公不從亂被害

姚李二公廟 在德勝門外十三里祀宋統制姚興
招撫使李顯忠又南鄉亦有姚公廟

旌忠廟 在北鄉定林鋪祀宋統制姚興父子紹興末金主亮南侵統制與金遇於尉子橋力戰殺數百人父子俱死事聞卽其砦立廟及復淮西又立廟戰所賜額旌忠統制以四百騎當金人數十萬金人相謂曰有如此者十輩吾屬敢前乎

三賢祠 在德勝門大街祀漢文翁宋包拯元余闕康熙六十年知縣覃懷建今廢

五賢祠 在府學元至元間縣學建三賢祠祀宋馬亮包拯王希呂明正統初改建增祀漢文翁元余闕包馬二公祠 在縣橋東今廢宋韓元吉記載集文

三孝祠 在前大街祀明孝子張梅湯鼎朱世藩

張公祠 在水西門外祀明知府張瀚今廢爲肥寧

庵有明王錫爵碑記載集文

屠公祠 在後大街和平橋西祀明知府屠仲律雍

正三年知府孔興誥重建有杜聰碑記載集文

呂公祠 在小東門大街祀明知府呂鳴珂今圯

張公祠 在威武門內祀明知府張大忠今廢

王公祠 在十字街子胥臺西祀明知府王倬後廢

乾隆三十年公孫王起鳳重建

賈公祠 在後大街和平橋西祀明知府賈克忠今

廢

雙馮公祠 在後大街縣橋南之東祀明知府馮聖

世 本朝知府馮景夏乾隆三十一年建

李公祠 在和平橋西祀明推官李哲後增祀 本

朝知縣李魏有碑記載集文

劉公祠 在井梧巷祀明知縣劉徽

來公祠 在舊軍器局西局對雙馮公祠祀明知縣

來三聘今廢

自張公祠至此共十皆官於廬之專祀也

蔚公祠 在前大街洛水橋西祀明禮部尚書蔚綬

張公祠 在時雍門大街萬壽寺東祀明副都御史
張淳

蔡公祠 在十字街東祀明尙寶卿蔡悉

孫公祠 在南門大街祀明衛輝知府孫鎮

雙忠祠 在威武門外觀德橋東祀明指揮使宋瑄
西寧侯宋瑛瑄諡忠烈瑛諡忠順故稱雙忠

按忠烈乃建文賜諡史失不載但史稱定遠人而
廟與墓俱在合肥豈籍定遠而家于合肥者歟知
府陳廷綸有重修碑記載集文

合肥縣志卷第十二